

- पैली वाळा प्रधानमंत्री डॉ. मनमोहन सिंह रो काल नई दिल्ली मांय सरकारी मान सागे दाग कर्यो जावेला।
- राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेन्द्र मोदी समेत केई नेता देवलोक व्ह्या नेता ने सिरधाभाव सागे याद कीना।
- प्रदेश मांय आज केई ठोडां माथे मावठ-झालावाड़, झुंझुनूं अर हनुमानगढ़ मांय ओळा पड्या।
- ख्वाजा साहब रो सालाना उर्स अनौपचारिक तौर ऊं काल सरु व्हेला।

000

पैली वाळा प्रधानमंत्री डॉ. मनमोहन सिंह रो काल सरकार मान सागे दाग कर्यो जावेला। वां रो आखिरी सफ़र संवारे साढे नौ बज्यां नई दिल्ली रा कांग्रेस मुख्यालय ऊं सरु व्हेला। कांग्रेस रा महासचिव के.सी. वेणुगोपाल बतायो के डॉ. मनमोहन सिंह री पार्थिव देह अंतिम दर्शन सारु आज नई दिल्ली मांय वां रा रेहवास माथे रखी ज्यी है। वेणुगोपाल बतायो के पैली वाळा प्रधानमंत्री रा पार्थिव शरीर ने काल संवारे कांग्रेस मुख्यालय ले जायो जावेला, जठे वां रा आखिरी दर्शन कर्या जा सकेला।

000

केन्द्रीय मंत्रिमण्डल पैली वाळा प्रधानमंत्री डॉक्टर मनमोहन सिंह रे देवलोक व्हेवण परां शोक जतायो है। ई सारु राखी ज्यी मीटिंग मांय वां रे देवलोक व्हेवण परां पास करी ज्या शोक प्रस्ताव मांय कही ज्यो के देश एक नामी सियासतदान, अर्थशास्त्री अर नेता ने गमा दीनो। मीटिंग मांय दो मिनट रो मौन राख र मनमोहन सिंह ने सिरधाभाव सागे याद करी ज्या। प्रधानमंत्री नरेन्द्र मोदी मीटिंग मांय पूरा देश री ओर ऊं डॉ. मनमोहन सिंह रा पिरवार रा प्रति दुःख जतायो।

.....

शोक प्रस्ताव मांय कही ज्यो के डॉक्टर सिंह सार्वजनिक जीवन मांय अमिट छाप छोड़ी अर साल 1991 ऊं 1996 बीचे देश रा वित्त मंत्री रह्या डॉ. मनमोहन सिंह कानी ऊं करी ज्या माली सुधारां री सगळा सराहवणा कीनी। प्रस्ताव मांय वां री भणार्ई-लिखाई ऊं जुडी उपलब्धियां अर सार्वजनिक जिन्दगी मांय करी ज्या बेहतरीन कामां रो ई जिकर करी ज्यो। पाड़ोसी देशां समेत दुनियाभर रा नेता डॉ. मनमोहन सिंह ने होशियार अर दूर री सोच राखण वाळा नेता बताता थकां श्रद्धांजलि दीनी। राष्ट्रपति द्रौपदी मुर्मू, उपराष्ट्रपति जगदीप धनखड़ अर लोकसभा अध्यक्ष ओम बिरला समेत दूजा केई नेता मनमोहन सिंह रे देवलोक व्हेवण परां शोक जतायो है। कांग्रेस रा अध्यक्ष मल्लिकार्जुन खड़गे वां रा शोक संदेश मांय देवलोक व्ह्या पैली वाळा प्रधानमंत्री ने बेदाग छवि वाळा दूर री सोच राखण वाळा नेता बताया। कांग्रेस रा नेता राहुल गांधी कह्यो के डॉ. सिंह री सादगी अर अर्थशास्त्र री गहरी समझ देश ने प्रेरणा दीनी।

मुख्यमंत्री भजनलाल शर्मा पैली वाळा प्रधानमंत्री ने सिरधाभाव सागे याद करता थकां कह्यो के देश विद्वान अर्थशास्त्री अर होशियार प्रशासक गमा दीनो।

.....

000

केन्द्रीय कृषि अर किसान कल्याण अर ग्रामीण विकास मंत्री शिवराज सिंह चौहान आज जोधपुर रा केन्द्रीय शुष्क क्षेत्र अनुसंधान संस्थान-काजरी रो दौरा कर वैज्ञानिकां सागे बातचीत कीनी। वे काजरी फार्म मांय उग्योडी साखां, पेड़-पौधां अर खेती-बाड़ी री तकनीकां रा बारा मांय वैज्ञानिकां सागे विगतवार बातचीत कीनी। श्री चौहान कह्यो के किसानां ने खेती ऊं मिलण वाळो मुनाफो बधावण सारु वां ने बेगी पाकण वाळी अर कम पाणी री जरूरत वाळी साखां री किस्मां मुहैया करायी जा रही है। ई मौके जोधपुर रा विधायक अतुल भंसाली ई मौजूद हा।

000

प्रधानमंत्री नरेन्द्र मोदी ई दीतवार 29 दिसम्बर ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई

कार्यक्रम री 117वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। आकाशवाणी समाचार री वेबसाइट अर न्यूज ऑन एआईआर मोबाइल एप माथे ई ओ कार्यक्रम प्रसारित कर्यो जावेला। इण ने आकाशवाणी समाचार, डी.डी. न्यूज, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई सुण्यो जा सके है।

000

प्रदेश मांय आज केई ठोड़ां मावठ व्ही जद के कठे-कठे ओळा ई पड़्या। नुवा आतूणी विक्षोभ रा असर ऊं चित्तौडगढ़, पाली अर भीलवाड़ा समेत केई ठोड़ां घणी धुंअर बीचे रिमझिम बिरखा व्ही। केकडी, चूरू, अजमेर, सीकर, नागौर अर राजधानी जयपुर मांय ई बरसात व्ही। हनुमानगढ़ जिला री भादरा तहसील रा झासल गांव मांय दोपहरां री बगत ओळा पड़्या। झुंझुनूं जिला रा पिलानी मांय ई तेज बरसात सागे ओला पड़्या।

झालावाड़ जिला मुख्यालय सागे झालरापाटन अर भवानी मंडी मांय ई बिरखा सागे ओळा पड़बा रा समाचार है। नीम का थाना जिला मांय ई लारली रात ऊं बिरखा व्हे रही है। कोटा अर बारां मांय ई सिंज्यां री पोर छांटो-छिड़को व्ह्यो। भरतपुर, जयपुर ग्रामीण अर सवाईमाधोपुर जिलां मांय ई बिरखा व्हे रही है। नागौर मांय आखा दिन बादळा मंड्या रह्या। म्हाणा खबरनवीस बतायो के श्रीमाधोपुर, खेतडी, पाटन अर उदयपुरवाटी मांय लारली रात सरू व्ही बिरखा रुक-रुक र आज दिन मांय ई चालती रही, जिण ऊं केई ठोड़ां पाणी भर ग्यो।

.....

मौसम केन्द्र जयपुर रा निदेशक राधेश्याम शर्मा बतायो के आवता चौबीस घंटा मांय केई ठोड़ां बिरखा व्हेवण अर ओळा पड़बा रा आसार है।

.....

राजसमंद मांय शीतलहर रा असर ने ध्यान राखता थकां प्रशासन एडवाइजरी जारी कीनी है अर सफाखाना मांय मरीजां रा ईलाज सारू जरूरी दवाइयां तैयार राखण रा हुकम दिया ज्या है।

000

बारां जिला रा बोरिना गांव मांय पतंग उड़ाती बगत बिजली री हाईटेंशन लाइन री फेंट मांय आ जावण ऊं दो बच्चां री मौत व्हे गयी। दूजी कानी अजमेर जिला रा नसीराबाद मांय रोडवेज री बस अर ट्रक री टक्कर मांय 12 जणा जख्मी व्हे ग्या। घणा जख्मी पांच जणा ने अजमेर रैफर करी ज्या है। हादसो घणा कोहरा रे कारण निजर नी आवण ऊं व्ह्यो। जयपुर ग्रामीण जिला मांय भोजलावा कने व्ह्या एक गैर सरकारी स्कूल री बस खाडा मांय पड़ जावण ऊं एक अध्यापक री मौत व्हे गयी अर बीस ऊं बत्ता विद्यार्थी जख्मी व्हे ग्या।

000

जयपुर रा जवाहर कला केन्द्र अर पंचायती राज भवन आज-काल न्यारा-न्यारा राज्यां ऊं आई खुद सेवक समूहां री महिलावां री मेहनत ऊं बण्या साज-ओ-सामान रो गवाह बण रह्या है। अठे चाल रह्या सरस राजसखी राष्ट्रीय मेळा मांय देश री विविधता ने एक ही ठोड़ महसूस करी जा सके है। 30 दिसम्बर तांई चालण वाळा ई मेळा रा बारा मांय और जाणकारी सारू पेश है एक रपट –

.....

000

अजमेर मांय भरण वाळा ख्वाजा साहब रा 813वां सालाना उर्स री तैयारियां जोरां ऊं चाल रही है। उर्स री अनौपचारिक सरूआत काल झंडो चढ़ावण री रीत सागे व्हेला। चांद निजर आवण परां उर्स री तौर तरीका ऊं सरूआत व्हेला। म्हाणी खबरनवीस बतायो के जायरीन रा सुबीता अर हिफाजत सारू जरूरी इंतजामात कर्या जा रह्या है।

.....

000

पाली मांय सुशासन सप्ताह रे तैत आज नगर निगम री ओर ऊं खास सफाई अभियान चलायी ज्यो। नगर निगम रा आयुक्त नवीन भारद्वाज बतायो के सुशासन सप्ताह रा तैत शहर रा बगीचां, जलाशयां, चौराहां अर महापुरुषां री मूर्तियां री साफ-सफाई करी जा रही है। ई सागे ई सार्वजनिक शौचालयां री ई रोजीना सफाई करायी जा रही है।

000

झालावाड़ मांय 15 दिसंबर ऊं सरु व्ह्या मुख्यमंत्री आयुष्मान आरोग्य शिविरां रा तैत आज उन्हेल, घाटोली, गरनावद, दुधालिया, डोण्डा अर पनवाड़ मांय शिविर लगायी ज्या। आं मांय आस वाळी 187 महिलावां री स्वास्थ्य जांच करीजी अर 247 मामलां मांय औरल कैंसर स्क्रीनिंग, 17 ब्रेस्ट कैंसर स्क्रीनिंग अर 04 सर्वाइकल कैंसर स्क्रीनिंग करीजी।

000